

REGIONAL NEWS

HEADLINES :-

1. Thihna hneha Isua Krista thawhleh ni (Easter) Mizoram pumah hlim taka lawm a ni.
2. Lunglei district Police-ten Lunglei khawpui huam chhunga dan kalha Myanmar raltlante'n an rawn ken luh Kenbo125 bike 60 ke hma an thlawnsak tawh.
3. Jammu & Kashmir-ah ruah bawhawk sur vangin mi 3 an thi.
4. Russia President Vladimir Putin-a'n Easter pualin Ukraine lakah darkar 30 chhung inkahhai a puang.

<><><>

EASTER

Khawvel chhandamna atana khenbeh a nih hnu a mihringte'n chatuan nunna an neih theihna atana Isua Krista a thawhlehna ni (Easter Sunday) chu khawvel ram dangte rualin Mizoram pumah hlim taka lawm a ni.

Tukin khawvar hlim khan Chhandamna Sipai Pawl band party-te chuan, "A tho ta, a tho ta, Fak r'u Isua a tho ta," tih hla Aizawl khawpui leh khaw hrang hrangah rimawi hmangin an rem a ni.

SFX : Salvation Band Party Ressurrection

Chhandamna Sipai Pawl bakah hian Kohhran engemaw zat thalaite chuan ni chhuah rualin biakin emaw biakin tualah emaw Pathian biak inkhawm an huaihawt bawk.

SFX : Sunrise Service

Catholic kohhran chuan sakhaw hunpui bikah chuan Judate ni chhiar dan zawmin nimin ,Inrinni khaw thim fel atangin Isua thlan venpuina (Easter vigil) hun an hmang tan a. He inkhawm hi Catholic Kohhranah chuan inkhawm zawnga urhsun bera neih niin zan inkhawmah sathau khawnvar chhi engin Isua thawhlehna kawngzawh huaihawtin bati chhit kengin kawng an zawh a ni.

Vawiin hian Presbyterian kohhran chuan Pathianni dang ang lovin Sande sikul ai-ah tualchhung kohhran pui-ah Isua Thawhlehna Ni hi an lawm a. Chawhma inkhawm thupui atan 'Krista an khenbeh kha a tho leh ta' tih a ni a, chawhnu inkhawm thupui atan 'Thawhlehna tunah leh nakinah' tih hmangin zan inkhawm thupui atana thlan chu 'Thawhlehna thu hretute kan ni,' tih a ni thung. Chawhma inkhawm banah Krista Thawhlehna ni pualin thingpui ruai buatsaih a ni a, 'Easter Egg' ti a sawi artui cheimawi leh thingpui hmeh hrang hrangte inkhawmhote'n an changho a ni.

Lungleia Kohhran hrang hrangte'n Krista thawhlehna hibiak-inah urhsun takin an lawm a, Chhim lama kohhran lian ber,BCM chuan "Lalpa chu a tho leh takzet a ni" tih thupuiah hmangin sermon ngaihthlak a ni a, inkhawm banah thingpui leh chhang bakah, artuite sem a ni. Chawhnu ah zaikhawm a hun hman a ni.

Lawngtlai a hmunpui nei Lairam Isua Krista Baptist Kohhran chuan thupui thlan bik nei lovin tualchhung Kohhran tinah Thawhlehna Ni hi hlimtakin an hmang a. chhunlamah Kohhran hrang hrang ten thihna hneha thlan atanga Isua a thawhlehna lam hawi thuchah an ngaithla a,

Isua Thawhleahna chuan Mihringten chatuan nunna an neih phah tak dan te ngaihthlak a ni. Serchhip-ah pawh he ni pual hian Salvation Army-te'n kum danga an lo tih thin danin tawtawrawt ri nen 'Sunrise Service' hun an hmang leh a, Catholic kohhran te pawhin Thawhleah lawmna ruai an theh bawk.

Tukin khawvar rual khan Kolasib a Salvation Army Corps pahnih-Kolasib Corps (Hmarveng) leh Diakkawn Corps Band party te chuan thihna hneha thlan ata Isua a thawhleahna hriatpui nan Kawng an zawh a, hmun engemawzat ah Isua thawhleah thu rimawi hmangin an puang a. Anni bakah hian Kohhran thenkhata thalaite pawhin Isua thawhleahna thu, hmangin an puang bawk.

<><><>

AMC

Aizawl Municipal Corporation (AMC) chu Bawngkawn a lirthei dahna tur in chhawng sakna a cheng vaibelchhe 7 leh nuai 85 chuang felhlel taka hmanga puh an ni.

Local fund audit on the accounts of local authorities director report atanga a lan danin AMC hian Bawngkawn a Sairang peng bulah Atal Mission for Rejuvenation & Urban Transformation (AMRUT) hnuaiah lirthei dahna chhawng (multi-level parking) din turin ruahmanna an siam a. He in sakna atan hian a tira hnathawktu (contractor) nena an inremna aia za zela 226 dawn sum sen a ni. Audit report-in a tarlan danin lirthei dahna tur sakna hmun hi Lalbiakdiki ram a ni a, ram neitu nen hian November ni 22, 2016 khan inremna siam a ni a. He in sakna atana senso tura a tira ruahman chu cheng vaibelchhe 2, nuai 63, sing 9, sang 1 leh 812 a nih laiin sum ruahman hi cheng vaibelchhe 8, nuai 59, sing 8, sang 1 leh 032 ah tihpun chhoh a nih thu audit report chuan a sawi a. A tak taka he lirthei hunna tur In sakna atana senso chu cheng vaibelchhe 7, nuai 85, sing 8, sang 5 leh 613 ni-in auditor-te chuan an sawi a ni.

AMRUT-in a tum chu mipui mamawh chi hrang hrang - tui, tui paihna felfai, khawpui a veivahna leh hahdamna hmun (park) din te a ni a, hei hi mirethei zawkte leh rualban lote tana a bika ruahmanna pawh siam tur a ni. Chutiang a nih lai chuan he lirthei dahna in an sakna-ah hian AMRUT inkaihhruaina hi zawm a ni lo niin audit report chuan a tarlang a. Inremna an siamah chuan he in hi kum 30 atan tih a nih lai-in audit a nih hun lai kum 6 hnu-ah pawh he in atang hian AMC in cheng khat pawh a la hmulet lo mai ni lovin tun thleng hian he lirthei dahna inchhawng hi hman tangkai a la ni lo a ni. Chuvangin cheng vaibelchhe 7 leh nuai 85 chuang senna hi tul lova mipui sum senralna mai niin audit report chuan a tarlang.

Hei bakah hian an inremna point 6-na angin ram neitu hian AMC In sakah hian kaw khat chu ama pualin dawr atan a hmang a, AMC hian engtin mah an ti lo niin tarlan a ni a. AMC thuneitute chuan he lirthei dahna in chhawng hi a tirah AMRUT sum hmanga sak an tum na a AMRUT sum hi an hmang leh ta lo niin an sawi a. Chu bakah August ni 4, 2022 a AMC executive council thukhawm chuan lirthei dahna in chhawng hi AMC Plaza, Bawngkawn ti-in a hming an thlak thu an sawi bawk a. February ni 15 2024 khan AMC Plaza hi Zote Projects, Zarkawt-in kum thum chhung atan inremna ziah a ni a. Thla tin cheng nuai 3 sing 8 chawi a luah hawh tura inremsiamin, kum 20 chhung a kumtin za zela 5 a luah man pung turin an inrem a ni.

AMC insawifiahna hi auditor-te chuan an pawm lova, kum 6 chuang hman tangkai lohva cheng vaibelchhe 7 chuang senna hi sawi mam theih a nih loh bakah a ram neitu-in he building chhunga ama dawr a lo siam ngawt pawh hi thil felhlel tak a ni an ti bawk.

<><><>

BIKE TYRES

Lunglei district Police-te chuan Lunglei khawpui huam chhunga dan kalha Myanmar raltlante'n an rawn ken luh Kenbo125 bike 60 ke hma an thlawnsak tawh.

Lunglei district SP Pu Jerome Lalmuankima hnen atanga thu dawn danin Zirtawpni khan Lunglei khawpui chhung leh a chheh velah China siam Kenbo125 bike 55 chu a ke hma lam thlawnsak an ni a, nimin khan 5 dang thlawnsak leh an ni. SP chuan ramdang siam lirthei, India rama ziahluh lohte lakluh hi dan kalh a nih thu sawiin , tlanchhuah phei chu dan bawhchhiatna a ni a ti. Dan an bawhchhiat avang leh ruihhlo leh dan phal loh thil phurhna atana an hman lohna atan bakah khalh chhuah hrim hrim chu dan kalh a nih avangin an khalh chhuah loh nan hmala ta an nih thu a sawi a. Kenbo bike neitute hi thubuai siamsak an ni lo chungin hetiang a Kenbo125 motorcycle neite hi fel taka a neitu leh an awmna chhinchhiah vek an ni a, an rama an kir leh dawn hunah a ke hma an thlawnsak hi harsatna siamsak hauh lovin an pelet leh nghal dawn niin a sawi a. Lunglei khawpui an tuam hnuah thingtlang lam pawh enfiah zui zel a, hetiang a hmalak zui zel hi an tum thu a sawi a ni.

He tih lai hian transport department enforment lam pawhin kar kalta khan Kenbo 125 4 tiamin China siam bike 6 chu Sihhmui khua-ah an man a , Transport hotute sawi danin ramdang atanga lakluh lirtheite hi ministry of road transport & highways-in dan (standard operating procedure) a siam ang zulzui a chhiah 'customs duty' pek loh chuan India ramah ziah luh (register) theih loh a ni an ti a. Khalh chhuah phei chu Motor Vehicle Act, 1988 section 192-in a khap bur niin an sawi.

Thu dawn danin China siam lirtheite hi Myanmar ramri hrulah an hmang tangkai hle a. Mizoram chhung a chengte pawh nei an awm a, ramri khaw thenkhatah chuan VC-te'n an khaw hming lam tawi-in emaw number an siamchawpsak nia sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

I&K CLOUD BURST

Jammu & Kashmir Ramban dist-a tukina ruah bawhawk surah mi 3 an thi a, an zinga 2 chu naupang an ni. Vanduaina hi Seri Bagna-a thleng a ni a, nizan zankhua khan ruah leh thli a thawh bakah rial nasa takin a tla a, hmun engemawzatah lei a min bawk a ni.

Ruahsur nasa vangin Jammu biala Dharam Kund khuaah pawh tuilianin chenna in 40 vel a hnawl a, mi 100 chuang chhanchhuah an ni tawh a ni. Lei a tlak reng avangin National Highway hrang hrangte chu khar a ni a, khua a ziaawm a kawng thenfai fel anih hma chuan mipuite chu lirtheia chhuak lo turin thuneituten an ngen a ni.

Hetih lai hian vur sur nasa avangin Kargil-ah khawsak phung a khaihlak phah nasa hle a, vur tla hian thingkung tam tak a tihchhiat bakah kawlpheha pek chhuahna-te pawh a tichhia a ni.

<><><>

PUTIN DECLARES EASTER TRUCE

Russia President Vladimir Putin-a'n Easter pualin Ukraine a beihna chu darkar 30 chhung chawlhsan anih tur thu a puang a, Ukraine lam pawhin an zawm ve a beisei thu a sawi bawk.

Hetih lai hian Ukraine President Zelensky-a chuan Easter puala inkahhai chu ni 30 chhung pawhsei ni se a ti a, US-in ni 30 chhung inkahhai neih a rawtna chu Putin-a hian a la pawm thei lo, a ti bawk.

Russia President Putin-a'n Easter puala Ukraine laka inkahhai a puan hi zanin zanlai-ah a tawp ang.

<><><>